

1 TIMOTEO

Paulom dis tcgāyas tc'āà di sa

Timoteom koe

Téé-cookg'ai sa

Timoteo ba kò qari-kg'ao-coa me e, dtcòm-kg'aom Asia dim nqōóm koe guua ba, a kò Juta dis khòès ka hēé naka Gerika dim khòèm ka hēéthēé ábàèa hāa (Tsee 16:1-3). Paulom cgoam kò xg'ae a tsééan kúrú, a ba a kò Paulo ba qāè tchōàn xгаа-xгаа koe hùì.

Paulom dis tc'āà dis tcgāyas Timoteom di sa ko nqoana zi gúù zi ka kg'ui:

1. Kg'aikas ko tcgāya sa tshúù-ntcōan di xгаа-xgaan ka kg'ui. Ncēe xгаа-xгаа nea kò c'ēe xòè za Juta ne di i, a c'ēe xòè za Juta tama ne di i, a i a ko máá, ncēem nqōóm di zi gúù zi tshúù zi i, témé. Ncēè khòèan kò gaxu di tc'ēe-kg'áma chómsea qgóóa qari ne cúí i gha kgoarakuan hòò o, naka qgóose-kg'áman ncēe c'ēe zi tc'ōo zi tsi tc'óó tama hēé, a sèè taman hēéthēé ko kúrú ne.
2. Tcgāya sa ko kerekes di tsééan ka hēé, naka còrèan ka hēé, naka tséé-kg'ám zi kerekes di xu tc'āà-cookg'ai xu gha kúrú zi hēé naka hùì-kg'ao xu hēéthēé gha kúrú di x'áèan tcg'óó.
3. Còò dis kam ko Timoteo ba bìrfa kg'ónòè, Jeso Krestem dim qāàm qāè bam gha kúrú sa, naka ēem gha ko kúrú zi tséé-kg'ám zi ka hēé naka tāáka zi xg'ae zi dtcòm-kg'ao ne di zi koem gha kúrú zi ka hēéthēé e.

Qaa-qaasa kg'uia ne:

- xгаа-xгаа sa
- dtcòm sa
- Nqari-tcáóa ne
- kerekes di xu tséé-kg'ao xu

Tcgāyas q'oo koe hāna zi:

- Tséé-kg'ám zi kerekes di zi hēé naka gas di tséé-kg'aoan hēéthēé e (1–3)
- X'áè-kg'áman Timoteom ko máàè e (4–6)

Tséé-kg'ám zi kerekes di zi hēé naka gas di tséé-kg'aoan hēéthēé e (1–3)

Tsgámkaguku zi

1 ¹Paulo ra a, Jeso Krestem dir x'áè úú-kg'ao^a ra, Nqarim gatá dim Kgoara-kg'ao ba hēé naka Jeso Kreste ba hēéthēé tsara ma x'áèa khama, ncēe ta Gam koe nqòda hāa ba.

²Timoteo, dtcòman koe tiri tsi cóá tsi tseegu di tsi ra ko *ncēes tcgāya sa* góá máá a ko máá:

Nqarim Abo ba hēé naka Jeso Krestem gatá dim X'aiga ba hēéthēé tsara koe guua hāa cgòmkuan hēé, naka thòd-xama-máákuan hēé naka tòókuan hēéthēé méé i tsáá cgoa hāa, témé.

Tshúù-ntcōan xгаа-xгаа dis dqàèku sa

³Maketonia koer ko qòd kar kò birí tsi, Efeso koe méé tsi hāa sa, naka tsia c'ēe ne khòè ne xgáè-kg'am, táá méé ne tǎá zi gúù zi tshúù-ntcōan di zi xгаа-xгаа sa. ⁴Tshúù-ntcōan di huwan koe hēé naka chòd tama qhàòkuan khòè ne di ka kg'uian koe hēéthēé méé ne tcg'òose, Nqarim di tsééan dtcòman di koe i kǎà hùì i ke, a ko mèékuan cúíga ghùì. ⁵Ncēe x'áè-kg'áman koer ko nxàes gúù sa ncàmku si i: q'anos tcáo sa hēé, tchànos tc'ēe-kg'ám sa hēé, naka q'anos dtcòm sa hēéthēé koe guua sa. ⁶C'ēe ne khòè ne ncēe zi gúù zi tcg'oaragua, a kǎà hùì zi kg'ui zi koe tòósea. ⁷X'áè xгаа-xгаа-kg'aoa ne ne gha kúrú sa ne ko tc'ēe, igabaga ne ēe ne ko kg'ui sa c'úúa hāa. Kgoarasea hāase ne ko gúù zi ka kg'ui igabaga ne dùú sa zi ko méé sa c'úúa hāa.

⁸Q'ana ta hāa x'áèa ne qǎè e sa, khòèan kò ko qǎèse tséékagu u ne. ⁹Ncēe sa ta thēé q'ana hāa khama: x'áèa nea qǎè khòèan kúrúa mááè tama, a x'áèan ko khóá khòèan hēé, uè khòèan hēéthēé kúrúa mááèa, Nqari-tcáo taman hēé naka cg'ǎè cauan hēéthēé, tcom-tcomsa taman hēé naka Nqarim ka ko cg'ǎè gúúan kg'ui ne hēéthēé, kg'áò xòdan hēé naka dxàè xòdan hēé ko cg'òoan hēéthēé, cg'òo-kg'aoan hēé, ¹⁰cg'ǎrà-kg'aoan hēé, gaan khama ma kg'áò khòèan cgoa ko séèkuan hēé, ts'ǎà-kg'ao xu khòèan di xu hēé, tshúù-ntcōa-kg'aoan hēé, naka khòèan c'ēe gúúan qǎè xгаа-xgaan cgoa qòda mááku tama ko kúrú hēéthēé i kúrúa mááèa.

a 1:1 x'áè úú-kg'ao - Gerika sa ko “apostolo” témé.

¹¹ *Ncēe qāè xгаа-xгаа ne* ko ts'ee-ts'eekg'aièam Nqarim di qāè tchōàn x'áàko koe hòdse, *qāè tchōàn* ncēm máà tea hāa koe.

X'aigam Nqarim di cgómkua ne Paulom koe

¹² Jeso Krestem gatá dim X'aiga ba, ncēe kò qarian máà te bar ko qāè-tcaoa máá, tcom-tcomsa ra a sam kò bóò, a kò nxárá tcg'óò te Gam di tsééa ner gha kúrú ka khama. ¹³ Eētar xg'ao ko ma Nqarim ka cg'āèse kg'ui, a xgáèku-kg'ao ra a, a tshúù-kg'ao ra a, igabagar xg'ao thòò-xama mááè, ncēe zi gúù zir ko c'úùase kúrúa, a dtcòmman úú tama khama. ¹⁴ I kò cgómkuan gatá dim X'aigam di tíí koe ntcāna tcāà, a dtcòmman hēé naka ncāmkuan hēéthhéé máà te Jeso Krestem koe.

¹⁵ Kg'uian ncēea tseegu u, a kg'anoa wèè za ga i ga dtcòmme sa, ncēe ko máá: Jeso Kreste ba nqóómkg'ai koe hààraa, chìbi-kg'ao nem gha hàà kgoara ka, ta ko méé e, ncēe ra tíí gane ka kaisase chìbiga ra a ne. ¹⁶ Tíí koem gha Jeso Kreste ba Gam di qáò tcáoan wèè ga x'ái domkar kò thòò-xama-máákuan hòò, tíí ncēe kò kaisase chìbiga ii ra, nxāasegar gha ēe gha Gam koe dtcòm a chòò tamas kg'òè sa hòò ne koe x'ái sa ii ka. ¹⁷ X'aigam, ncēe tshoa-tshoase-q'oo, a chòò-q'oo úú tama, a x'óó tama, a bóòèa hāa tite ba, ncēe cúí iim Nqari ba méém chòò tamase tcomkuan hēé naka x'áàn hēéthhéé máàè. Amen.

¹⁸ Timoteo, tiri cóáè, ncēe x'áè-kg'áma ner ko máà tsi, porofiti xu kò tsáá ka porofita kg'uian cgoa ko qòòà mááku u, nxāasega tsi gha gaa kg'uian cgoa qāès ncōo sa x'āà ka. ¹⁹ Qgóóa qari dtcòm sa hēé naka tchānos tcáo sa hēéthhéé e. C'ēe ne khòè ne aagu sia, a gatà hēéan ka dtcòmms gane di sa chúú-chuua hāa ke. ²⁰ Gane xg'aeku koe tsara ko Humenaioa tsara Alekesantereia tsara hāa, ncēer satanam tshàu q'oo koe tcana hāa tsara, nxāasega tsara gha xгаа-xгааè a Nqari ba táá cg'āèse kg'ui cgoa ka.

Nqari ba dqòman di x'áè-kg'áma ne

2 ¹ Wèé zi gúù zi cookg'ai koer ko gaa domka dtcàrà tsi, wèè khóèan ga tu gha còrèa máá sa, a còrèa mááku, a c'ēean téé-q'oo koe còrè, a tu a Nqari ba qāè-tcaoa máá di còrèan còrè sa. ² X'aigan ga hēé naka wèéan ēe tc'amaka hàna zi téé-q'oo zi dian ga hēéthhéé méé i còrèa mááè, naka ta gha nxāasega kgàea hāas kg'òès tòókuan di sa kg'òè, Nqari-tcáoase naka qāè qgóósean úúase, wèé zi qgái zi kg'òèa ta di zi koe. ³ Ncēe sa ta kò ko kúrú ne i gha qāè e Nqarim gatá dim Kgoara-kg'aom cookg'ai koe, a i a gha qāè-tcaokagu Me, ⁴ Nqarim ncēe wèém khòèm gha kgoaraè, a tseeguan q'āa sa ko tc'ēe ba. ⁵ Cúím Nqari ba hàna khama, Me gataga cúím Khòè ba hàna, khóèan hēé naka Nqari ba hēéthhéé ko xg'ae-xg'ae ba, Khòèm Jeso Kreste ba, ⁶ ncēe kò kg'òèa ba máàna hāa ba, wèé ne khòè ne di kg'òèa nem gha x'ámá kabi ka, a kò gatà hēéan ka qāèm

x'aèm ka Nqarim ka nxárá tcg'òòèas x'ái sa ii ba. ⁷Ra ncēes gúùs domka tséé sa máàèa, Nqarim di kg'uiua ner gha nxàe, a x'àè úú-kg'ao ba ii ka (tshúù-ntcōa tamar hāa a ko tseeguan nxàe), a gha tǎá zi qhàò zi dim xgaa-xgaa-kg'ao ba ii ka, dtcòmàn hēé naka tseeguan hēéthēé koe.

⁸Khòè xu méé xu wèè qgáian koe, tcom-tcomsa tshàuan ghùia hāase còrè sar ko tc'ēe, xgòà naka ntcoeku tamase. ⁹Naka zi thēé khòè zi t'òè-t'òese qāèse hāan ka, sauha hāase naka tcomkuan kg'anoa hāam dàòm ka hēéthēé e, naka táá kaisase t'òè-t'òè c'òò guu, kana gautan hēé kana t'òè nxōán hēé kana kái marian ko qaa qgáian hāa guu. ¹⁰Igabaga qāè tséé-kg'áman cgoa méé zi t'òè-t'òese, Nqari-tcáóa zi hāa sa x'áísea hāa zi khòè zi khama ma. ¹¹Khòè sa méés nqooa hāase xgaa-xgaase, wèè tcáóa sa cgoa máàsea hāase. ¹²Ra khòè sa kgoara máá tama xgaa-xgaas gha sa, kanas gha khòèm tc'amkg'ai koe qarían úú sa, igabaga méés nqooa hāa. ¹³Adam ba tc'āà a kúrúèam ga me e, si Efa sa kháóka kúrúèa khama. ¹⁴Me kò Adam tama me e ncēe kò qàe-qaeè ba, igaba dxàes khòè si i ncēe kò qàe-qaeèa, a cg'āèan koe tcana sa. ¹⁵Igabagas gha khòè sa cóán àbà ka kgoaraè, ncēè dtcòmàn hēé, ncàmkuan hēé, q'ano-q'anosean hēé naka qāè qgóósean hēéthēé cgoas kò ko còoka qòò ne.

Kerekes di xu tc'āà-cookg'ai xu hēé naka hùì-kg'ao xu hēéthēé e

3 ¹Kg'uim ncēe ba tseegu me e ncēe ko máá: Khòèm kò kerekes dim tc'āà-cookg'ai ba téé kg'oana nem ko qāès tséé sa tc'ēe, ta ko méé ba. ²Kerekes dim tc'āà-cookg'ai ba méém khòèm c'ēe gúù domka ga chìbi-chìbiè tite ba ii, naka ba cúfs khòès dim khòè ba ii, qgóóse ko ba, tc'ēe-kg'áma ba tchàno ii ba, qāè kg'òò ba, khòè ne ko x'áéa ba koe qāèse hààkagu ba, a khòèan xgaa-xgaa di tcáóan úúa ba, ³kg'áà-kg'ao tama ba, a xgáèku di tama ba, igaba méém tc'aaua hāam khòè ba ii, ncōo di tama ba, mari ncàm tama ba, ⁴gam dim x'áé ba qāèse tc'āà-cookg'iaia hāa ba, a ko gam di cóán kúrú i komsana me ba, a wèè qgáì koe ga qāè qgóósean úúa ba. ⁵(X'áém gam di bam gha ma tc'āà-cookg'ai sam kò c'úua hāa ne ba gha mtama ma Nqarim dis kereke sa ma q'òé?) ⁶Táá méém **dtcòmàn koe** kaba ii, naka ba gha nxāasega táá bód-bòòse, naka dxāwam di xgàrakuan koe cg'áéa tcāa guu. ⁷Khòè ne kerekes ka tchāa koe hàna ne ka tcommèa hāam khòè ba méém ii, naka ba gha nxāasega táá sau-cgaekaguè, naka ba táá dxāwam dim dàòm koe cg'áéa tcāa guu.

⁸Kerekes di xu hùì-kg'ao xu méé xu gataga tcom-tcomsa xu khòè xu ii, cam kg'ám-tsharà tama xu, kái gōéan kg'áà koe tòòse tama xu, a mari ka cg'áré tcáó tama xu. ⁹Chómsea zi gúù zi dtcòmàn di zi ncēe tseegu ii zi méé xu qarika q'ano-tcáóan cgoa qgóóa hāa. ¹⁰Gataga méé xu kg'aika kúrúa bódè thēé, a ncēè káà chìbi xu u sa i kò bódèa hāa ne méé xu nxāwa kerekes di xu hùì-kg'ao xu kúrúè. ¹¹Khòè zi méé zi gataga tcom-tcomsa zi i, naka táá cg'āè zi gúù zi c'ēe ne ka nxàe, igaba méé zi

qgóósean úúa, naka wèé gúúan koe tcommèa hãa. ¹²Kerekes dim hùì-kg'ao ba méém cúís khòès dim khòè ba ii, naka cóáa ba hée naka x'áéa ba hēéthēé qāèse tc'āa-cookg'aia. ¹³Kerekes di xu hùì-kg'ao xu kò ko gaxu di tsééan qāèse kúrú ne xu ko qāès téé-q'oo sa hòòà mááse, a kgoarasease gaxu di dtcòmman ka kg'ui Jeso Krestem koe.

¹⁴Tcoma ner úúa, hààr gha qháése xg'ae cgoa tsi di i, igabar ko ncēe zi gúú zi góá máá tsi, ¹⁵ncēè ãor kò ko ne tsi gha q'āa ka, khòèan méé i ntama ma Nqarim di ne khòè ne xg'aeku koe qgóóse sa, ncēe kg'òèa hãam Nqarim dim kereke ba, tseegus di qhùri-c'òá ii, a tshoa-tshoase-q'oo sa ii ba. ¹⁶Ntcoe gham khòè ba káà me e, chómsea zi gúú zi gatá dis dtcòmms di zia kaia hãa sa:

Nqari ba kò khòèan dis iis koe x'áíse,
 a **Tcom-tcomsam** Tc'ēem ka tchànóm ii sa x'áíè,
 a moengelean ka bóòè,
 a qhàò zi di ne koe xgaa-xgaaè,
 a nqóómkg'ai koe dtcòmòmè,
 a x'ààn koe qàòkaguè.

X'áè-kg'áman Timoteom ko máàè e (4–6)

Tshúù-ntcōa di xu xgaa-xgaa-kg'ao xu

4 ¹Tcom-tcomsam Tc'ēe ba ko qāèse bìrí ta a, còò di x'aè ka ne gha c'ēe ne khòè ne dtcòmman aagu, a ne a gha hoàkaguko tc'ēean koe hēé, naka dxāwa tc'ēean di xgaa-xgaan koe hēéthēé máàse sa. ²Ncēe xgaa-xgaaku ne cg'lāè cau xu tshúù-ntcōa-kg'ao xu koe guua, ncēe gaxu di tcáóan kùrusam qanom cgoa dàoèa khama ii xu. ³Khòèan xu ko séèkuan cara, a xu a ko x'áèan tcg'òó, táá ne gha c'ēe tc'òo-qhàò ga tc'òó di i, tc'òoan ncēe Nqarim kúrúa hãa a, ēe dtcòmmaa a tseeguan q'ana hãa ne gha qāè-tcaoan cgoa tc'òó ka a. ⁴Nqarim kúrúas gúús wèé sa qāè si i, khama i cúí gúú ga xguìè tite, ke méé ta qāè-tcaoan cgoa tc'òó o. ⁵Nqarim dim kg'ui ba hēé naka còrèan hēéthēé cgoa i ko qāè-qāèe ke.

Qāèm tséé-kg'aom Jeso Krestem di ba

⁶Ncēè ncēe zi gúú zi ka tsi kò tsáá ka c'ēe ne q'āa-q'āa ne tsi gha Jeso Krestem di tsi tséé-kg'ao tsi qāè tsi i. Gataga méé tsi dtcòmman hēé naka cgáé xgaa-xgaan ēe tsi xùria hãa hēéthēé di kg'uian cgoa xáròse. ⁷Dxāwam di huwan káà hùì koe méé tsi tcg'òóse, naka tsia Nqari-tcáóan koe qari-qarise. ⁸Tc'áróa tsi kōèan di zi gúú zi cgoa qari-qari sa cg'árése cgáé si i, igaba Nqari-tcáóa hãase kg'òè sa wèé zi gúú zi koe cgáé si i, ncēes kg'òès koe hēé naka ncēe gha ko hààs kg'òès koe ga hēéthēés nqòòan úúa hãa khama. ⁹Ncēe kg'ui ne tseegu u, a wèé za ga i ga dtcòmòmè sa kg'anoa hãa. ¹⁰Kg'òèa hãam

Nqarim koe ta nqòda ta tòoa, wèe ne khòe ne dim Kgoara-kg'ao ba, gatà hées ka gane èe dtcòma hãa ne di ba. Gaa domka xae ko kaisase tsée a ko xhõe.

¹¹Ncèe zi gùu zi mée tsi khòe ne birí naka gazi ka xгаа-xгаа ne. ¹²Táá hée naka i khòean cg'áré tsi i domka ncoé tsi guu, igaba mée tsi dtcòm-kg'ao ne koe x'ái sa ii, kg'ui-kg'ámá tsi ka hée, qgóose-kg'ámá tsi ka hée, ncàmkuuan x'áía tsi ka hée, dtcòma tsi ka hée, naka q'ano-tcáose kg'òèa tsi ka hée hée e. ¹³Gataga mée tsi **Nqarim di zi Tcgāya zi** nxarán koe hée, khòe ne ghùu tc'èean koe hée, naka khòe ne xгаа-xgaan koe hée hée tòose, nakar nxāakg'aiga sí hàà. ¹⁴Tsáá koe hãas abas, ncèe porofiti xu kò porofitas kg'uis koe tsi guu a máàèa sa, èe xu kò kerekes di xu kaia xu tshàua xu tòò cgae tsi x'aè ka, sa táá hée nakas aaguse cgae tsi guu.

¹⁵Tsée zi ncèe zi koe mée tsi máàse, naka qarika tsée zi, naka gazi koe hãa, naka i nxāasega còoka tséa qòd-q'ooa tsi wèe khòean ka bódè. ¹⁶Tsáá hée naka èe tsi ko xгаа-xгаа sa hée hée mée tsi kòre. Qàd tcáóan cgoa mée tsi kúrú si. Gatà tsi kò hée ne tsi gha tsáá hée naka èe ko komsana tsi ne hée hée kgoara ke.

Dxàe-ntcōa zi hée naka kaia xu hée naka qāan hée hée e

5 ¹Kaiam khòe ba mée tsi táá dqàè guu, igaba mée tsi tsarim xòdm khama ma kg'ui cgoa me, qāè qgóosean cgoa, naka qárí-kg'ao xu tsáá qōea xu khama ma qgóó. ²Kaia zi khòe zi mée tsi tsari zi xòd zi khama ma qgóó, naka dxàe-coa zi tsáá qōea zi khama ma qgóó, q'ano-tcáóan cgoa wèe za ga.

³Dxàe-ntcōa zi, ncèe tseeguan kaga ko hùian qaa zi mée tsi tcomkuuan cgoa qgóó. ⁴Igaba ncèe dxàe-ntcōas kò cóán kana tsgōo-coan úúa hãa ne mée i dtcòm koe ko qaase sa kg'aia xгаа-xgaase, naka gaan di khòean q'òé, naka xòd ga ne hée naka tsgōose ga ne hée hée kúrúa máá, ncèe sa ko Nqari ba qāè-tcaokagu ke. ⁵Dxàe-ntcōas ncèe tseeguan kaga ko hùian qaa a qhàd ga úúu tama sa, nxāa sa nqòda sa Nqarim koe tòoa hãa, a sa a ko ntcùu ba hée naka koaba ba hée hée còrè, a ko Nqari ba dtcàrà hùu sim gha ka. ⁶Igabaga dxàe-ntcōas ncèe nqōóm di karean cgoa ko qgóé sa x'óóa hãa, kg'òèas hãa igaba. ⁷Ncèe zi x'áè-kg'ámá zi mée tsi máà ne, naka ne nxāasega c'èe gùu domkaga táá chibi-chibiè guu. ⁸A ncèe c'èem khòem kò gam di qhàdan kúrúa máá tama, kana gam x'áé di ne kúrúa máá tama, nem dtcòmnan ntcoea hãa, i qgóose-kg'ámá ba èe dtcòm tamam dian ka cg'āè e.

⁹Dxàe-ntcōas kò 60 kurian nqáea hãa a sa a xg'ao cúim khòem ka sèèa ne cúis gha dxàe-ntcōa zi dis xg'aes koe tcāè. ¹⁰Gataga méés gas di zi tsée zi qāè zi ka q'āaèa, ncèe cóán kaikagu di khama ii zi, khòean qāèse qgóóan ka hée naka c'èe ne dtcòm-kg'ao ne qámsea máán ka hée^b naka qóman koe hàna ne hùian ka hée naka qāè zi tsée zi wèe zi koe tcāan ka hée hée e.

b 5:10 dtcòm-kg'ao ne qámsea máá - es ko Gerika sa máá: “tcom-tcomsa ne di nqàrèan xg'aà,” témés gùu sa.

¹¹Cg'aré zi dxàe-ntcōa zi mée tsi gaas xg'aes koe táá tcāa guu, hēe zi gha a Krestem tc'ēe tama sa kúrú, a zi a gha tcáóa zi tc'ēea sa xùri, a kg'ádò-khoean sèe ke. ¹²A zi a gha gatà hēean ka tc'āà dis nqòòkagukus gazi di sa aagua, a gha ncēm dàm ka xgàrasean óaga cgaese. ¹³Gataga zi ko kàà hùì zi gúú zi koe tcāase, a ko x'áé xu koe qòòdate, kàà hùì zi gúú zi cúí zi koe tamase, igabaga zi ko khòèan c'amate, a ko khòèan di tséean cuiaka koe ga tcāa, a ko kg'ui tama zi ga hāa gúúan ga kg'ui. ¹⁴Gaa domkar ko tc'ēe, cg'aré zi dxàe-ntcōa zi gha sèèe, a cóán úú sa, a x'áéa zi kòre sa, naka zia gha nxāasega táá cg'òo-kg'aoan tshúú gúúan kg'ui di x'aèan máà guu. ¹⁵C'ēe zia nxāakamaga nxana hāa a ko satana ba xùri. ¹⁶C'ēes khòès dtcòm-kg'aos ko x'áéa sa koe dxàe-ntcōa zi úúa ne méés hùì zi, nakas gha nxāasega kereke sa táá tséean ka qómá máàe guu, naka sa dxàe-ntcōa zi tseeguan ka ko hùian qaa zi hùì.

¹⁷Kaia xu ncēe ko kereke zi qāese qòòkagu xu mée xu kaisa tcoman máàe, kaisase qarika ēe ko Nqarim òm kg'uim koe tséé a ko xгаа-xгаа me xu. ¹⁸**Nqarim dis** Tcgāya sa ko máá: “Ghòem kò ko maberean náà gáí a ko dxòò ne mée tsi táá qhòem kg'ám me guu,” témé ke. A sa a ko gaicara máá: “Tséé-kg'ao ba gam di surutan ka kg'anoèa hāa,” témé. ¹⁹Kerekes òm kaim kò ko **cúim khòem ka** chibi-chibiè ne mée tsi táá tseegu iise sèe e guu. Càm kana nqoana khòèan kò ko nxāea tseegukagu u ne cúí mée tsi tseegu iise sèe e. ²⁰Eè ko chibian kúrú xu mée tsi wèè khòèan tcgáí q'oo koe dqàè, naka ne gha nxāasega c'ēe ne gaa koe **x'áí sa bóò naka** bèe.

²¹Nqarim koe hēe naka Jeso Krestem koe hēe, naka nxará tcg'òòèa xu moengele xu hēéthēe cookg'ai koer ko kgoara-tcáóase x'áè tsi, ncēe x'áèan tsi gha qgóóa qari ka. Ncēe zi gúú zi tsi kòò kúrú ne mée tsi khòèan táá táákase qgóó guu, naka gataga táá c'ēe khòèan ncàm naka c'ēean hòre guu.

²²C'ēm khòem tc'amkg'ai koe tsi kò tshàua tsi tòò **a tsi a Nqarim di tséean máà me** kg'oana ne mée tsi táá qháé ii guu. Naka tsia gataga c'ēe ne khòè ne di chibian koe táá tcāa guu. Tsáá ka qgóóse naka q'ano ii.

²³Tsari ncāan di thòòan hēe naka káise tsāan hēéthēe domka mée tsi táá tshàn cúí ga kg'áà guu, igaba mée tsi cg'aré gòe-coan ga tséekagu.

²⁴C'ēe ne khòè ne di chibia ne ko bóòse, a ko xgàrakis cookg'ia ne koe hānas koe úú ne, igaba i ko c'ēe ne khòè ne dian còò ne. ²⁵Gatà iim dàm ka zi ko qāe zi tséé zi bóòse, a ncēè qāese zi kò bóòse tama ne zi chómsea hāa tite.

6 ¹Wèem khòem ēe qāam ii dis joko sa ko tcèè ba méém gam ka q'òòse ba wèè tcoma nem úúa sa x'áí, naka i gha nxāasega Nqarim di cg'òèan hēe naka Gam di xгаа-xgaan hēéthēe táá cg'uri-cg'uriè guu. ²C'ēe ne qāa nea dtcòmān úúa hāa q'òòsean úúa; nxāa ne mée ne táá cúis dtcòmā di ne e domka cg'aré tcoman máà ne guu. Igabaga mée ne

tc'ëe-tc'ëese naka bìrìse naka máá: “Q'òðse ga nea dtcòm-kq'ao ne e, a ncàm-ncamsa ne e thëé, a ko wèè qaria ne cgoa kúrú, qāà ne ne gha hù ka,” témé. Ncëes gúús domka méé ne kaisase tsééa máá ne.

Tshúù-ntcōan di xгаа-xгааkuan hēé naka tseegu di qguàan hēéthēé e

Ncēe zi gúú zi ka méé tsi khòè ne ntcàm naka xгаа-xгаа. ³C'ëe ne khòè ne ko tǎá zi gúú zi tshúù-ntcōan di zi xгаа-xгаа, a ne a kg'òèkaguko kg'uiian gatá dim X'aigam Jeso Krestem di koe dtcòm tama, a gataga xгаа-xгааsean khòèan ga ma Nqari-tcáóase kg'òè di koe dtcòm tama. ⁴Ncēeta ne kò ko hēé ne ne ko bóð-boose, a cúí gúú ga kóma q'āa tama, a ntcoeku a mēeku sa ncàma. Ncēe mēékuan di zi kg'ui zi ko tauan di kg'uiian hēé, ncōoan hēé naka còèkuan hēé naka cg'āè zi tc'ëe zi hēéthēé ghù. ⁵Gataga zi ko ncēe zi kg'ui zi mēékuan di zi cg'āè tc'ëe khòèan, ncēe tseeguan ka aaguse cgaeèa koe xòm x'āè di zi xg'ore zi ghù. Ncēe ne khòè ne ko tc'ëea máá, khòèan di Nqari-tcáóa nea qguàan dim dàò me e, ta tc'ëea.

⁶Khòèm kò Nqari-tcáóa hāa nes ko nxāa sa qguùkagu me. Ncēe sa gha kúrú me me qāè-tcao ēem úúa hāas gúús domka khama. ⁷Cúí gúú ga ta nqòòmkg'ai koe óa ta ga hāa, a ta a gataga cúí gúú ga nqòòmkg'ai koe séèa tcg'òóa hāa tite. ⁸Igabaga ta kò tc'òoan hēé naka qgáian hēéthēé úúa ne ta gha gaan ka qāè-tcao. ⁹Khòè ne ēe qguù kg'oana ne ko dxāwam di qāè-qaekuan koe tcāàse a ne a ko ntcóms tshúù-xam a káà hù zi tc'ëe zi dis koe cg'áéa tcāà. Ncēe zi tc'ëe zi ko khòèan di kg'òèan tshúù-tshuu a zi a ko cg'òo o. ¹⁰Marian di ncàma nea wèè zi cg'āè zi dim tōbe me e khama. C'ëe ne khòè ne ncēe ko marian kaisase qaa ne dtcòmān koe hoàkaguèa a kái thòð-tcaoan óaga cgaeesea.

Qāès ncōos dtcòmān di sa x'āà

¹¹Igaba tsáá, Nqarim di tsi khòè tseè, wèè gúúan ncēe koe qgóéa tcg'oa, naka tchànoan hēé, Nqari-tcáóase kg'òèan hēé naka dtcòmān hēé naka ncàmkuān hēé naka qáò tcáóse hāan hēé naka qāè tcáóase kg'òèan hēéthēé x'āà máá. ¹²Qāès ncōos dtcòmān di sa x'āà. Chòð tamas kg'òè sa qgóóa qari. Gaas kg'òès domkaga a kò ii, ncēe tsi kò tciia óáèa hāa ka, a tsi a ko gaa domka dtcòmā tsi kái ne khòè ne cookg'ai koe nxāea hāa, ncēe ga nxāea tseegukagu u ne. ¹³Nqarim ncēe wèè zi gúú zi ko kg'òèan máām cookg'ai koer ko ncēe x'áèan máà tsi, naka Jeso Krestem cookg'ai koe hēéthēé e, ncēe kò Pontiose Pilatom cookg'ai koe Gam dis dtcòm sa nxāea tseegukagua ba, ¹⁴a ra a ko máá: ncēm x'áè-kq'ám ba méé tsi káà chibi iise, naka chibi-chibiè titesse qgóóa qari, nakam nxāakg'aiga gatá dim X'aigam Jeso Krete ba sí x'áise. ¹⁵Nqari ba gha kúrú Me Me Gam tòóa hāam x'āèm ka sí x'áise,

Nqarim ncēe tcom-tcomsa a cúsega tc'āà-cookg'ia ba,

Gaam wèé xu x'aiga xu dim X'aiga ba,
a wèé xu nqàrì xu dim Nqari ba.

¹⁶ Gaam cúí Me e ncēe x'óó tite ba,
Gaam ncēe cúú cgaeè titem x'áàm koe x'ãèa ba,
Gaam ncēe cúí khòè ga bóò ta ga hãa ba kana bóò tite ba.
Gam koe méé i tcoman hēé
naka qarian hēéthēé chòò tamase hãa. Amen.

¹⁷ Ncēem nqóóm koe hàna ne khòè ne qguùà ne méé tsi x'áè-kg'áñan máà naka ne táá kái-kaise guu kana gane di nqòðan tcommè tamas qguùs koe tòó guu, igabaga méé ne gane di nqòðan Nqarim koe tòó, wèé zi gúú zi qāè-tcaokagu ta a ko zi ko tc'ãðase máà ta a ba. ¹⁸ Gaa ne khòè ne qguùà ne méé ne qāè zi gúú zi kúrú, naka qāè tsééan kúrú ka qguù, naka khaàsa ii, naka ko gúúan q'aa-q'aaku ka tc'ēe. ¹⁹ Ncēem dàòm ka ne gha ko qguùan kúrúa mááse, si gha gane dis tshoa-tshoase-q'oo sa hààkom x'aèem ka qari ii, nxãasega ne gha tseegu dis kg'òè sa qgóóa qari ka.

²⁰ Timoteoè, máàèa tsi hãa sa méé tsi kòre. Káà hùì kg'uiian hēé naka ntcoekuan di zi tc'ēe-kg'ám zi hēéthēé méé tsi nxanagu, dxāwam di zi i ke. Gazi ncēe c'ēe ne khòè ne ko c'úùà hãase máá, 'tseegu di tc'ēe e' témé zi. ²¹ C'ēe ne khòè ne kò ncēe tc'ēean dtcòm, a ne a kò dtcòms koe hòà.

Nqari ba méém gam di gómkuan máà tu u.